

best.komp

Mag. St. B.

P

de land. Luss B. M. Virg. etc.




*Test. 544g.*













23  
SIMONIS STAROVOL<sup>ci</sup>.  
DIVA CLA  
ROMONTANA.

S E V

ORATIO

De Laudibus

BEATÆ MARIÆ  
VIRGINIS,

Cuius Imaginem D. Lucæ penicillo  
depictā, apud Czenstochouiam  
IN CLARO MONTE

Poloni circumq; vicinę gentespiè religiosèq;  
venerantur.

---

C R A C O V I Æ,

*In Officina Christophori Schedelij, S. R. M. Typogr.*

Anno Domini, 1640.

*4. XI. 3. 35*



Amplectamur Mariæ vestigia, (ô  
Poloni mei) & deuotissima suppli-  
catione, beatis illius pedibus prouol-  
uamur. Teneamus eam, nec dimit-  
tamus, donec benedixerit nobis.

D. BERNARDVS

*Serm. inc. 12. Apocal. ante med.*





24  
INCLYTO DYNASTÆ,  
CAZIMIRO LEONI  
SAPIEHÆ

Volpenſi, Luboſanenſiq;

PRÆFECTO,

Curia Magni Ducatus Lituaniae

MARſCHALCO,

Domino ſuo Colendiſſimo,

SIMON STAROVOLSCIVS,

*Salutem.*



Ereor, ne importunus & temerarius interpellator audiam ILLVSTRISſIME DOMINE, quòd occinente paſſim Othomanica tuba, munere hoc litterario compellare Te præſumam, qui armis nunc atque viris potiùs, quàm libris, aut Muſis, opus habes. Sed periculi imminentis gravitate conſiderata, culpam, ſi quæ hîc eſt, libens agnoſco: ſimulq; huius audaciæ veniam mihi facilè dandam auguror; quòd & Maria,

A ij

de



de qua mihi sermo, quæquæ à nobis pericula,  
dum supplices ante eam prouoluimur, Nati  
gratia, auerruncare soleat; & Tu ipsimet ad-  
nata tibi erga Dei Genitricem pietate, ac reli-  
gione, compellationes huiusmodi, à pijs ac re-  
ligiosis viris profectas, in beneficijs numerare  
soleas; & tum demum illustriorem Te existi-  
mes, cum opera Tua Religio Catholica, ab  
Hæresi, cultus Mariani blasphemata profana-  
trice vindicatur, & ad aram, Tuæ erga Christi-  
feram Virginem, pietatis atque deuotionis,  
huiuscemodi scriptis, aut elegantia donis, lita-  
tur. Eandem quoq; mihi veniam spondet, He-  
roicâ illa, à magnitudine hac animi dimanans  
humanitas, qua, neminẽ à Te, alloquioq; Tuo  
repellis, quin & accedere verecundantes, pau-  
peres, aut religiosos, vltro etiam invitas & pro-  
uocas. Nec mirum / semper enim sanguini  
Tuo propriũ fuit, per humilem de grandibus  
meritis & virtutibus suis opinionem, ad subli-  
mem gloriam eniti, & fastum execrabilem vi-  
tare. Hinc passim è prosapia Sapieharum, in  
Magno Lituaniæ Ducatu, vrbium Præfecti,  
Dynastiarum Rectores, Prætores Satrapia-

rum



rum, Senatores primarij, excellentissimi Toparhæ: & quod in vna domo rarissimum, quinque & viginti, (præter innumeros Reipublicæ officiales & Administros) præcipuæ dignationis Palatini: quatuor imperatoria potestate, & militari peritia conspicui. Ioannes videlicet, Supremus Cancellarius Magni Ducatus Lituaniæ, acerrimi iudicij vir, & cum militia bonus, tum legatione Romana percelebris. Ioannes Vsuatensis Gubernator, Castellani Kiouiensis strenuissimi bellatoris haud imbellis filius, Terror Moscouiticus, & toto Septentrione celeberrimæ illius Troicensis victoriæ, qua centum Russorum millia profligata fuere, felicissimus Strategus. Andreas quoque Palatinus Polocensis, bellis Liuonicis, & victoria de Moscouitis apud Vēdam obtenta clarissimus. Tum denique recentis memoriæ, Leo Palatinus Vilnensis, Supremus Magni Ducatus Lituaniæ exercituum Imperator, parens tuus **ILLVSTRISIME DOMINE** desideratissimus, cum vtraque prudentia omnibus notus, tum ob singularem munificentiam, ac liberalitatem, coelo ipsi charus.



Quos sanè omnes, cum Principibus populi sui ille ipse, sedere voluit, qui humilia à longe cognoscit, & delectatur in operibus, non alta ambigentium. Vnicum etenim hoc studium illis, hæc cura assidua fuit, vt quam à maioribus suis, per longam annorum feriem deductam, acceperant Religionem, integram intemeratamq; seruarent; maiestatemq; & existimationem Patriæ, prudentibus consilijs, concordibus animis, viribus vnitis, opibus & facultatibus suis, quàm maximè, nihil penitus de se præsumentes, exornarent. Quod præclaro eorum exemplo, Te quoque ILLVSTRIS-  
SIME DOMINE, sapientissimè conatum obseruare, cum in diuersis Reipublicæ functionibus suspicimus, & miramur, tum in Moschouitica illa laudabiliter peracta legatione, optimi ciuis animum pernoscamus, & in expurgatione apud Vilnenses Calvinistici fermenti, verè pij & Christiani Senatoris zelum, venerabundi exosculamur. Perge vt cœpisti ILLVSTRIS-  
SIME DOMINE, & sospitu Virginis Fortunatricis, in cuius clientelam dudum Te deuouisti, prosperè procede, filijs, filiabusq; beatus.



26  
Qua in spe defino, simulq; Deum Opt: Max:  
venerans precor, atque adeo mecum omnes  
peculiari deuotione Mariæ addicti, vt exem-  
plo Tuo, ceu noui Liberij, reliqui Patriæ no-  
stræ Proceres, concordibus animis & votis, in  
commune Ecclesiæ Catholicæ, & Sarmatici  
Imperij bonum conspirent, barbaros depri-  
mant, Schismaticos ad vnionem reducant,  
Hæreticos extirpent, conatuumq; suorum in  
exornando & pacando Septentrione nostro,  
felicissimos Tecum successus fortiantur. Ita  
voueo. Ita Tu ferus in coelum abi.



## APPROBATIO.

Elogium Sanctissimæ Dei Genitricis, Virginis MARIÆ, beneficiorum votis, ad Sacram illius Imaginem, in Claro-monte propè CZENSTOCHOVIAM, miraculosè collocatam, nuncupatis obtentorum, sub titulo DIVA CLAROMONTANA, ab Adm̃ Reñdo SIMONE STAROVOLSCIO, præclarè confectum; vt ad fidelium mentes, eidem Reginæ Cœli & Terræ, Matrisq; Misericordiæ deuotas exhilarandas, possit in lucem prodire; Ego Iacobus Vstiensis, S. Th. & I. V. Doct. & per Diæcesim Cracouiẽ. Ordinarius Librorum Censor, concedo facultatem.



A D D I V A M  
CLAROMONTANAM  
CZENSTOCHOVIEN.

A B

Adm Rñdo SIMONE STAROVOLSCIO  
Laudibus celebratam,

M. IOANNIS CYNERSKI RACHTAMOV I  
*Coll. Maioris Regij P.  
Melos Votivum.*



Virgo norma Virginū,  
Mater perennis gratiæ,  
O montis, ô clarissima  
Patrona, Czēstochouij.  
Claremus almo nomine  
Tuo, Tuisq; maximis  
Quæ sentimus miraculis,  
Regni Poloni Sarmatæ.  
Laudes Tuas quis dixerit?  
Laudes Tuas quis scripserit,  
X Digno



11 Dignofatis præconio,  
Vel oris alto Spiritu?

Quam primus olim pinxerat,

11.11.11 LVCAS Imaginem Tibi,

Tu pignus hoc amabile,

Das Sarmatis clientibus.

Imago hæc à cætu pio,

In Patriæ discrimine,

Sic promouente Numine,

Seruata prouidè fuit,

Ad vsq; Constantissimi

Fide serenâ Cæsaris,

HELENÆq; sanctæ Cōiugis,

Beatiora tempora.

Hæc Imperatrix optima,

Conatibus prosperrimis,

Vastissimâ voragine

Crucem eruit Sanctissimâ.

Vbi Corona Spinea,

Clauiq; sunt cum lancea



93  
Sudariaque simul tria  
Reposita solertissime.  
Hinc per manus ab ordine  
Longissimo, nepotibus  
Seris, dabantur inuicem  
Fasces, vices per inuidas,  
Fatalem ad vsque Nicephorj  
Potentiam attritam nimis,  
CAROLVS ille, quam pius  
Monarcha Francorum, & LEO  
Dux Russiæ fortissimus,  
Iuuere contra barbaros;  
Gentemque Sarracennicam  
Fudere Marte nobili.  
At ille gratus Hospites,  
Donis beat Sanctissimis,  
Et Cæsari quidem sacras  
Dat Martyrum Reliquias.  
Porro LEONI Principi  
Tum Sorte contigit bona,



22  
O Virginum Deipara,  
Imago Tua pulcherrima.  
Nostris in oris inclytum  
Salve decus, salve Sacrum  
Pignus, Parentis optimæ  
Pignusq; Nati paruuli.  
Quid de Tuo Dux nomine,  
Arcem struis fortissimam?  
Vrbemq; nobilissimam,  
In corde vastæ Russiæ?  
Hæc Arx erit fortissima,  
Hæc Vrbs erit ditissima,  
Munimen & tutissimum,  
Contra Scythas vaferimos.  
Est hoc Asyllum augustius  
Quàm Romulus construxerat!  
Palladium hoc fælicius  
Quàm quod repertū in Illo est!  
Virginis hanc Imaginem  
Fortem, Serenam, nobilem,



Horrescet omnis barbarus  
 Gelonus, & ferox Scythes.  
 Quid Arce Belzensi locas,  
 Pignus Beatæ Virginis,  
 Princeps LEO? hâc cū mœnibus  
 Post quinque secla deferet,  
 Ritusque barbaros, simul  
 Et perduelles incolas,  
 Græcamque contemnet fidem  
 Sibi hospitam quærens domum.  
 Assurge Bellator potens,  
 Assurge Opolienfium,  
 Dux omnium dignissimè,  
 Dux omnium fortissimè,  
 Fauet Tibi Rex optimus,  
 Hungariæ, Poloniæ,  
 LVDVICVS, omnis & fauet  
 Senatus addictissimus,  
 Istud manet te prodromum  
 Munus, locandę Palladis,



28  
In altiori montium  
VLADSLAE felicissime.  
Scis è quibus periculis,  
Hæc te fauens erexerit  
Patrona? quantum debeas,  
Scis Vindici munus Tuæ?  
Illa illa Bellatrix pia,  
A te Scythas teterrimos,  
Acerrimo in discrimine  
Presit! citissimè cadit  
Ventofus ille Spiritus,  
In pertinaces poplites!  
Tibi datur victoria,  
Spēs, vita, pax optatior.  
Iacent vias per inuias,  
Per tesqua, per senticeta,  
Mille hostium cadauera,  
Calcata militiâ poli.  
Ergo vt monent in somnia  
Diuinitus tibi data,



Imaginem augustissimam,  
Loca sereno vertice.  
Et Patribus purissimis,  
Custodiam firmissimam  
Concede, qui PAVLI Patris  
Vitæ innocentiam probant.  
Hic collocata, provide  
O Virgo mater Virginum,  
Matrumque Virgo maxima,  
Nos quæ premat necessitas.  
At ista quæ nam stigmata?  
Vultus refert amænior?  
Quis ausus est tantum nefas,  
Laniata vecordissimus?  
Audite gentes vltimæ,  
Audite gentes intimæ,  
Vel quæ rigetis Arctico  
Aquilonioque sub Ioue:  
Vel quæ caletis ignibus  
Præfulgurantis lampadis:



12  
Audite quod scelus! scelus!  
Quod ille scelus! ecquod scelus!  
Patrarit Hufsitaniæ  
Assertor Hæresis vagus;  
Et menteluscus, & oculo,  
Oculo strabo, menteque strabo,  
Zis- (ô quid impedis pudor  
Monstrum sine vt eloquar ferox)  
Ziska improbissimus latro,  
Et proditor nequissimus;  
Vecors animicida, impius  
Veterator innocentiaë,  
Mastix sacrarum imaginum  
Vaferrimus, crudissimus:  
Et fannio infannissimus,  
Et Natta perditissimus,  
Et Vappa fallacissimus,  
Et morionum pessimus,  
Ingessit ista verbera,  
Incussit ista vulnera,



Impresit ista stigmata,  
 Imagini Sanctissimæ.  
 O vbi Fas iustissimum!  
 Vbi, vbi, Ius sanctissimum!  
 Vbi Deus sunt fulmina  
 Horrenda, trifulsa, aspera?  
 Hem condole ô Regum optime  
 VLADSLAE condole? condole?  
 Iniuriæ grauissimæ?  
 IAGELLO Victor Prussiae.  
 Dolet, dolet Rex optimus,  
 Victor dolet fortissimus,  
 Iubetque nobilissimos  
 Addi colores: sed cadunt!  
 Manent, manent grauissimæ  
 Iniuriæ recentia  
 Et cruda semper vulnera  
 Et cruda semper stigmata.  
 At perdit sicarij,  
 Diuina vos acerrimè



16  
Semper sequetur ultio,  
Nemesisque præsentissima.  
Vos vota Ciues optimi,  
Precesque sacras iungite,  
Nobis sit vt benignior  
Regina Regni Sarmatum.  
Exempla mille comprobant,  
Et mille millium optimam,  
Et mille millium intimam  
Propensionem Virginis.  
Nonnulla STAROVOLSCIVS,  
Author grauis, stylo graui,  
Fide graui, grauißimis  
Lectoribus, tandem citat,  
E pulueribus Annalium,  
Si tuque contemptissimo,  
Originem antiquissimam,  
In publicam lucem eruens.  
Audi preces alacrius  
Quæ fusa plebès vndique



Effundit ad Te Sarmatum  
 Munimen augustissimum?  
 Hic mentis, ille corporis,  
 Æger, petit solatium;  
 Et impetrat! quid amplius?  
 Prostratus horror exulat!  
 Nostram Tibi Poloniam,  
 Tuam Tibi Poloniam,  
 REGEMq; deuotissimum,  
 Et posteros, & qui recens  
 Nunc natus est, infantulum,  
 RENATA cum pijsima;  
 Et cum Senatu patriam,  
 Laboriosamque inuicem  
 Doctoribus cum prouidis,  
 Iuuenumq; amæno cum grege,  
 ACADEMIAM, nos supplices  
 Tibi Clientes porgimus.  
 Tu nos Tua fortissimâ  
 Iuua manu, ne pertinax



Hostis viam præoccupet,  
Et obruat periculis.  
Tandem vltimo certamini,  
Quod styx parat vaferima,  
Præsto adsis omnes quæsumus,  
Depræliatrix optima.  
O Virgo norma Virginum  
Mater perennis gratiæ,  
O montis ô clarissima  
PATRONA, CZENSTOCHOVIJ.







# ORATIO DE LAVDIBVS DIVÆ CLAROMONTANÆ.

Vulgò Czenstochouiensis.



Eminem credo vestrum latet, Auditores Catholici, inter ipsa humanæ reparationis exordia, à Clementissimo Deo nullum firmitus, præsentiusq; nostræ imbecillitati statutum perfugium, quàm eius Augustæ Virginis tutelarem fidem, cuius decor beatarum mentium gaudium & admiratio est, cuius vterus Dei domicilium fuit; quæ altissimo illo, ac propemodum incredibili, sed priscis Oraculis conclamato, euocatisq; de cœlo testibus subsignato diuini afflatus connubio, dotalem accepit vniuersitatis dominationem. Atque hinc est, quòd eam Ecclesia Sancta appellat, *Cælorum Reginam*, & *Principem mundi*. Summus verò Ecclesiæ Pastor, & Doctor Gregorius, *Christianorum propugnatricem* & *Dominam*. Damascenus, *vniversi Orbis terrarum decus*, & *ornamentum*. Beatus Ephrem, *Letitiam Sanctorum*. Epiphanius, *Matrem gentium*. Methodius, *Gaudium nostrum inefabile*. Cyrillus, & Ildephonsus, *Matrem sanctæ spei*. Damianus, *Turrim eburneam*, propter fortitudinem aduersus omnes insultus Sathanæ. Mellifluus denique Bernardus,



*Reparatricem parentum; purificationem posterorum; restauratricem seculorum;* eo, quòd illa protulerit eum, qui erexit cadentem Adamum; illa profuderit fontem qui lauit genus humanum; illa genuerit verbum, in quo restaurata sunt omnia, siue in cœlis, siue in terris sunt. Hæc itaque superni & inferi Orbis Domina, cùm Christo in sublime recepto, insolito sanctitatis splendore, crescenti Ecclesiæ præfulgere cœpisset, & quæ maiestatem Nati, vultu, exemploq; ferebat, reconditum etiam in pectore haberet diuinorum consiliorum, & secretioris doctrinæ promptuarium, vnde cum Apostolis vniuersa Ecclesiæ posteritas ditesceret; multi qui de Euangelio quidquam inaudiuerunt, vel è remotissimis etiam à Palestyna prouinciis, accenso animo Hierosolymas concurrebant, ad videndum cæleste illud prodigium, Matrem & Sponsam Dei: Virginem vnà, & Genitricem Christi: Castam simul & fœcundam puellam: Fœminam parientem, sed absque viro: Mulierem, sed absque detrimento integritatis. Diuam talem, quæ vel solo intuitu pudicitiam cordibus, mentibus lumen, affectibus amorem cœlestium, rerumq; terrenarum contemptum infundebat. Prout inter alios credentes deuotos, reuersi ab ea in Siciliam cum epistola, Urbis Messanensis Legati, Senatui suo exposuerunt: comprobauitq; inter suos Græcos Dionysius Areopagita. Qui accedens ad Virginem, vt eam contemplaretur, splendore penitus offusus, & cœlesti illa pulchritudine, quæ ex vultu fulgurabat incensus & percussus, in eam est coactus prorumpere sententiam, quòd *nisi à Paulo Magistro suo mortalem didicisset fœminam, Numen cæleste credidisset, Numen diuinum adorasset.* Cuius pio exemplo, cùm plurimi è noua illa Christianitate reperirentur, qui Domini ac Dei sui in cœlo regnantis Matrem coram videre, & videntes iure suscipere atque reuereri optarent, nec omnes tamen vndique ad eam proficisci, suoq; desiderio satisfacere possent, prudens ac piuum consilium inuentum est, vt MARIÆ vultum saltem in tabel-



tabella depictum exciperent; hocq; perenne monum-  
tum, tum præsentes, tum absentes ad suum solatium retine-  
rent, aliiq; aliis communicarent. Atque ita Numinis dispo-  
siti. D. Lucas Euangelista, pictoriæ artis peritus, vt Theo-  
dorus Lector asserit, Augustum eius vultum, quem perpe-  
tuò deprecabuntur omnes diuites terræ, ab ipso archetypo  
exceptum, primus in imagine exhibuit. Quam, cum ipsa  
Virgo intuita fuisset, gratiam formæ suæ, quemadmodum  
Nicephorus Callistus ait, diuinitus immisit, multorum desi-  
deria explere cupiens, qui cùm longè disiti multisq; impe-  
dimentis dissipati, admirandam illam Angelis faciem co-  
ram intueri ac venerari non possent, ex missis hinc inde ex-  
emplaribus, sanctum ardorem quoquomodo mitigarent.  
Atque ita eius vbique exempla formæ, per manus Lucæ de-  
pictæ, expetebantur à Sanctis hominibus, quò semper in o-  
culis versaretur similitudo absentis, cuius præsentiam di-  
stantia loci suffurabatur. Inclytaq; hæc Cœlorum Regina  
atq; Domina Mundi, vt ipsa in terris, Filio cœlis recepto, e-  
rat refugium egentibus, auxilium petentibus, solatiumq;  
credentibus; sic ab eodem in æternum Dei templum illata,  
facta est nostrarum ærumnarum solatium, dolorum omni-  
um medicamentum, naufragiorum salus, portus salutis.  
Quod ipsum Diuus Anselmus considerans. *Magna, inquit,  
fuit misericordia Mariæ erga miseros adhuc exulantis in terra,  
sed multò maior est iam regnantis in cælo, quæ, cùm passim ad  
sacras Imágenes suas religiosè cultas, diuersa miracula pa-  
trare, ad solatium nostrum, consueuerit, tùm quos in clien-  
telam dedititios acceperit, næ illis beatè contingere non  
modo futuro perennis vitæ succesu, sed isto ipso humano-  
rum euentuum vsu prosperrimo euincit. Probauit hoc toti-  
es Orbis Christianus: Probauimus nos Poloni: experimurq;  
etiamnum assiduè ad Imaginem eius, opere & artificio Di-  
ui Lucæ percelebrem Czenstochouiæ: vbi Deiparam Virgi-  
nem in Monte Claro, velut in specula confidentem, vniuer-*



Regni prouinciis gratiam impetrare, ac per Diuas cuiusque Tutelares, velut in præfidia distributas (*virgines quippè adducentur post eam*) singulis opportuna beneficia dispertire certum putamus. Habet enim Cracouiensis Satrapia *Salomeam*: Submontana Regio, *Cunegundim*: Silesia, *Hedwigim*, Prussia Regia, *Sophiam*, Ducalis verò Borussia *Barbaram*, & aliæ prouinciæ alias, quæ omnes ad nutum Virginis, quasi vbique per illas ipsa sit præsens, rerum satagunt, Clientum suorum vota promouent, necessitatibus prouident, nouis etiam, si opus est, modis, pericula fugant, salutem creant. Si itaque huius Imaginis antiquitatem, populi Sarmatici religionem per tot sæcula continuatam, ingentia Virginis in Rempub. Polonam beneficia collata, eademq; tam probatis Cælo signis contestata, considerauerimus: Erit sanè vt Poloni tantæ suæ felicitati gratulentur, quòd imploratam in omni alea Virginis opem, tot indiciis adeò certam habent ac contestatam, vt planè obstrictam suis rebus Deiparæ voluntatem glorientur. Coëterum, quemadmodum Tertulianus priorem dixit, *esse animam, quam litteram; & sermonem, quàm librum; & sensum, quàm stylum*. sic ad eum modum & nos, priusquam de laudibus Inclytæ Cælorum Reginae, in Imagine Czenstochouiensi, à Diuo Luca repræsentatæ, quidquam dicemus, & in Claro illo Monte, clarissima illius beneficia, toties nobis, tùm publicè in vniuersam Rempub. tùm priuatim vnicuique supplici exhibita, rudi quamuis & crasso, sed ingenuo sermone describemus; consequens est & per quam utile, vt erectis in sublimè oculis, Diuam ipsam Sospitatricem nostram deuotissimè veneremur, quo, & pro hactenus præstitis nobis beneficiis, condignas ei grates referamus, & in futurum videlicet, contra quasuis aduersitates & pericula, præsentissimum eius auxilium nobis imploremus. *Eia ergo Aduocata generis humani, quæ nobis sine corruptione Deum peperisti, quæ Natum tuum venerantes, in singulare patrocinium recepisti, quæ gentes Christianorum, te, Fili-*  
umq;



umq; tuum collaudantes illustrasti, quæ tuis clientibus atque dediticiis ultroneam gratiam spondesti, ad sis quæsumus propitia, & exaudi ad te suspirantes Sarmatas tuos, quorum Regina appellari aliquando voluisti, ut quemadmodum à suscepto Evangelio nostris in necessitatibus ad te confugientes, salvi & incolumes viximus; sic & deinceps ad sacram Iconem tuam accurrentes, tuæq; beneficia & patratas virtutes enumerantes, sarti tecti maneamus: tum cœlestibus consolationibus repleti, cum cœlestibus mentibus glorificemus Deum, qui te creavit sapienter ab aeterno, & in Matrem intactam sibi elegit. Dignum itaque est, ut te verè Beatam dicamus Deiparam, & cum Sancto Iacobo, Semper Beatam, & omnibus modis irreprehensam Matrem Dei nostri magnificemus, honorabiliorem quàm Cherubim, & gloriosiores quàm Seraphim. Tibi enim, ô plena gratiæ, uniuersa creatura gratulatur, Angelorum cœtus, & hominum genus, quæ es Templum Sanctificatum, Paradisus spiritualis, Virginum gloria, ex qua Deus carnem assumpsit, & puer factus est Deus noster, qui est ante secula. Audi igitur ô benigna & dilecta, & tam mihi de tuis laudibus dignè loquendi gratiam, quàm meis Auditoribus grandia tua beneficia intelligendi, mentem cœlitus inspira, & faue.

Quæ in Ecclesia Dei, ab ipso veritatis fonte Christo Iesu, atque eius Apostolis deinceps, & Summis Pontificibus, diuinitus instituta sunt, fidei misteria, salutis Sacramenta, vitæ Euangelicæ dogmata, ritus & ceremonias ad veri Numinis cultum spectantes. A. N. hæc singula & uniuersa impij homines, infruniti Apostatæ, blasphemij; Hæretici, vituperare consueuerunt. Præcipuè verò Sanctorum in cœlo regnantium inuocationem, sacrarumq; Imaginum cultum, peruicacissimè oderunt. Atque inter omnes electos Dei, Virginem Mariam, quæ Sanctorum omnium Regina est, virulentis mendacijs afficiunt: sacrasq; eius Iconas, apud quas maxima mortales beneficia, ipsius precatu, à Numine Supremo, consequi solent, infinitis fere blasphemijs, emotæ



mentis homines, proscindunt & derident: quo vel sic à cultu Virginis, simplicem plebeculam, & innocuam puorum ætatem, auertere queant; mendaciorumq; suorum magistro Diabolo, præstito hoc officio complacere studeant. Atque ita, in primordiis statim Ecclesiæ, Iudæorum & Eunomianorum blasphemia in rudi populo sparsa fuit, miracula Gloriosissimæ Virginis, *non esse vera miracula, sed opera ministeriumq; Sathana, & iniquitatis*. Ita subsequentibus ætatibus, Copronymus Imperator, & Vigilantius Hæreticus, inuocationem Dei Genitricis piam, salutarem, & usu sempiterno Ecclesiarum comprobata, quasi *impiam & Diuino honori detrahentem*, repudiarunt. Quos imitatus Sarcerus maledicus, approbato portentoso illo de stirpe Virginis, Gnosticorum Hæreticorum commento, *cum multiplicem culpam, tum incredulitatem Sanctissimæ Dei Genitrici imponere non veretur*. Ita Faustus Manichæus, infauisto Rabbini Heccados, atque Seleuci, tramite procedens, meracissimas nugas de parentibus Virginis, eiusdemq; natalibus commentus est. Ætate quoque Origenis prodierat *impudens Hæreticus, nomine Celsus, qui non modò Mariæ, humile & simplex vitæ genus, quod fabri esset coniunx, inuerecundè illudens, non tantum non fortunatam, nec Regiam prolem, adeoq; vix suæ viciniam notam, sed potius exosam fuisse dicebat: sed & Christianis hoc nomine insultare veritus non est*. Ita florescente, sub Constantino Magno, Ecclesia Christi, Ephesina Synodus, turpissimos Nestorij errores, circa appellationem Matris Dei, singulari autoritate sua meritò pressit. Quos patrum nostrum memoria primarius Apostatarum blatero, Martinus Lutherus, iterum excitauit, *immodicèq; cultum Mariæ à Catholicis prædicatum, scriptis suis stupidissimè asseruit*. Exq; eius infernali disciplina, impudicus Melanchton, nos castos Dei Genitricis cultores, Colliridianis, qui in Syria statuæ Mariæ, ethnico more libabant, annumerare non veretur. Ita Franciscus Lam-



berti eadem impietate imbutus, negat Beatam Genitricem Mariam, virginitati perpetuæ se voto astringisse: quod idem ipsum cum eo blasphemant Conradus Pellicanus, Theodorus Beza, Petrus Martyr, Henricus Pilius, Bernardus Ochinus, Oecolampadius insanus, atque virulentus Bucerus. Ita eiusdem farinae confodales, Calvinus, Selneccetus, Heerbrandus, Bullingerus, Brentius, Seruetus, Zuinglius, maledicis linguis suis, honorem Virginis Theotocon proscindunt. Immaniores hac in parte, antiquis etiam illis Iconoclastis, ut qui non imagines sacras modò confringunt, & ludis impiis contaminant, ritum Ecclesiæ Catholicæ in illis colendis profanum habentes, sed omnem prorsus religionem Orthodoxis, acerbioris odio, probro & ioco vertunt: præsertim qui se vulgo Protestantes, aut Puritanos appellant. Siquidem impudicè negant, posse facere miracula Mariam. Inter illos autem Marbachius internali peste infectus, dicit etiam Christum ipsum per Mariam Matrem miracula edere non posse. Quem secutus impudens Illyricus, asserit signa ad Imagines Virginis Intemerata facta, fraude nostra conficta esse; adq. stultam superstitionem omnium refert. Insanus denique omnium Galasius vociferatur, magnam ex eo Christo iniuriam conciliari, quòd præter mentem illius, omnium nostrum Aduocatam vocemus Mariam: eiusq. Imagines sacras congrua veneratione passim prosequamur. Iurè de his omnibus Regius Psalter dicit. Posuerunt os suum in cælo, & lingua eorum transiit terra quòd & mortalium quemque optimum detractionibus suis prosciderint, & Superos omnes, Sanctorumq. omnium Sanctum Christum Iesum calumniis affecerint. Iurè & Sponsarum Sponsa de illis, tanquam ingratis clientibus olim, nunc capitalissimis hostibus suis conquæri potest. Filij matris meæ, quos olim salutari fonte regenerationis, tanquam vtero, Catholica peperit mater Ecclesia: Pugnaverunt contra me, verbis mendacij, verbis calumniæ: & maledictionibus detractionibusq. acuerunt lin-



*guas suas sicut serpentes*, vt inquit præmemoratus Psaltes. *Custodes murorum*, impij, blasphemæ, peruicaces, fidei damnatæ, & frontis perfrictæ, *inuenerunt me, & tulerunt pallium meum*, pallium laudis, pallium honoris, quo à Sponso meo fueram adornata.

Sed cōtriti sunt infidiatores, Catholici mei, ab eo ipso, qui in Matrem eam sibi elegit, & præ omnibus Sanctis, atq; beatissimis mētibus, excellentiorē habere voluit. Cōculcati supplantatores per eā ipsam, quæ dudū iam caput serpētis infernalis contriuit. Confutati derogatores per Spiritū Sanctum, qui de ea, per os Sanctōrū Patrū & Doctorū Ecclesiæ, magnifica locutus est, eiusq; superno afflatu, *Beatam eam dicunt omnes generationes*. Quin ipsis etiā Sectariis, Balaami more, aut Pilati, prophetantibus cōfidentibusue, *superior, dignior, atq; nobilior quacumq; creatura, censetur esse Maria*, sicuti sol in medio cœlo positus, qui est primus Planetarū, nobilitate, dignitate, splendore. Vnde etiam & intercessione sua, plus apud Deū, quàm cæteri Sancti valet, pluraq; beneficia mortalibus apud Filium, vti Mater dilectissima impetrat. Mediatrix enim est nostra, Aduocata nostra, Domina nostra, quæ sola hoc sæculo, in tam vario opinionum tumultu, veræ & Christianæ pietatis Tessera est. Quam, qui maximè colit, is sanè dignissimum se Deo reddit, & Matrem clementissimam experitur in necessitatibus, cum inter inimicos Ecclesiæ palam Dei Genitricem veneratur. Exempla infinita in promptu, sed vnum sufficit, quod paucos ante annos ipse, ex ore Viri Magnifici Petri Potocij Palatinidæ Braslauiensis Varsoviæ excepi. Aderat ille in Comitibus Regni, municipalis Legati è Satrapia Haliciensī officio fungens; cū interim stabuli eius præfectus quem egomet ipse optime nouerā Buczacix in Pocucia manens, Christianorū Bacchanaliorum tempore, parū Christiano animo se propria manu ebrius, interemisset quod virgo quædā nobilis, quā deperibat, fuerit sibi à parentibus inter conuiuandum, in matrimonium denega-



ta. Tanquam impius igitur & in semetipsum crudelis, extra cœmiterij septa tumultus, suffragiisq; fidelium priuatus: Qui tamen spiritum per cruentam frameam, qua se transfuerberauerat, exspirans, pœnitens facti ad Matrem misericordiæ, non in vanum suspirauerat; quæ eum subito Filio suo commendatum, quòd cum quodam Caluinista, pro suo honore, cum vitæ dispendio, in Lituania, armis decertasset, ad expianda in purgatorij igne perpetrata scelera, ad certum tempus relegauit, quærendiq; auxilij modum, prorsus defunctis aliis denegatum, apud Deum Patrem precibus suis impetrauit, vt nocte eadem Hero suo insomnio varsouix apparens, casus sui miserabilis historiam, & clementissimæ Reginæ Cœlorum promptum erga clientes suos affectum, veluti viuens præsensq; coram enarraret, petens per misericordiam Dei, Sacrum pro se Missæ Sacrificium quantocius peragi. Euigilauit bonus ille Dominus lucescente iam aurora, & somnio tam tragico consternatus, quæsiuit à pueris suis, num stabuli sui præfectus reapse cubi- culi sui ianuam intrasset: cumq; animaduertisset per somni- um tantum secum locutum fuisse, consuluit sacerdotes quid fieri putarent; quibus in iuuamen defuncti pronis, quamuis post duas vix septimanas, rei series ab arcis præfecto fuerit illi perscripta, triginta ad altaria priuilegiata Missarum sa- crificia, pro eo fieri curauit. Et cum ipse militari vitæ totus esset deditus, varia bellorum pericula animo voluens, pro- posuit in posterum toties capite discooperto, in honorem Virginis Beatæ assurgere, quoties miraculosum istud no- men Maria fuisset ab aliquo interloquendum prolatum. Nec sanè immeritò. Non enim adoratur Deus, vbi Virgo exulat, nec debita veneratione honoratur Filius, vbi Mater negligitur; (*quæ aliquid Numinis habet,*) inquit doctissimus vir Ericius Puteanus, *postquam nobis Numen peperisset.* De- usq; Optimus Maximus, qui olim miracula per virgam Moyfis, per pallium Helix, perq; asinam Balaami operaba-  
tur,



tur, nunc per Sanctos suos & eorum reliquias, perq; Virginem Mariam, quam sibi ab æterno præordinauerat, eiusq; sacras Icones, tanquam digniora instrumenta gratiæ suæ, Hæreticorum opinione patrare non poterit? Falluntur impij homines falluntur! & à parente mendaciorum suorum Lucifero excæcati, vti toto cœlo errant, ita impiè & vesanè piam Sanctorum inuocationem, Deiq; Genitricis auxiliare numen, contra omnem experientiam, & doctrinam Catholicorum negant, inquentes; *quòd mortui non audiant preces nostras, nec videant necessitates, vel si in cœlis sunt, valde à nobis distiti maneant.* Cum tamen & Sancti omnia in Deo, iuxta Ecclesiæ Sanctæ doctrinam, velut in speculo aliquo viuo videant, & sciant necessitates nostras; & Virgo Sacratissima, veluti Mater, plus illis omnibus, apud Vnigenitum suum valeat, atque omnia possit. Et exinde est, quod virtute diuina concedente Crucifixi imago, Diuum Thomam de Aquino allocuta fuerit Neapoli: Sanctam Heduigim Reginam Poloniæ Cracouiæ; & nostra ætate, vti fertur, Ferdinandum II. Imperatorem Viennæ. Beatæ quoque Virginis imago, audiuit orantem Diuum Bernardum Romæ, cum mente deuota verba illa hymni, *Monstra te esse Matrem* proferret. Consolata est Vladislaum Loëticum Regem Poloniæ, in maximis Reipub.urbationibus ad suum auxilium Visliciaë confugientem. Auertit oculos ab illo scelerato homine Anatola, de quo scribit Nicephorus. Retinuit Getam barbarum in porta Constantinopolitana, animo cruento in urbem cum exercitu irruentem. Allocuta est infinitos Sanctos Dei viros, atque foëminas; sed præcipuè Beatum Hyacinctum Cracouiæ; atque illum ædituum Romæ, qui Sanctum Alexium intromittere in templum nolebat. Denique Loretana Imago, vnà cum domuncula Beatissimæ Virginis, vt venit à Nazareth in Dalmatiam, atque inde in Italiam, toti iam Orbi manifestum est. Sacræ itaque Imagines, quæ in contemptu apud Hæreticos sunt, obstetricante conditoris

poten-



potentia, cum ad eum clamamus, & vota in cœlum emittimus, ubique terrarum audiunt, vident, loquuntur; & cum ille iubet; manibus palpant, loco mouentur, atque diuerſa, ſupra captum humanum, miracula faciunt. Quod igitur à tot iam ſæculis perpetuus Chriſtianorum conſenſus approbavit, Virginem Poloni, cum ubique paſſim, tum in Imagine Czenſtochouienſi, opere & artificio Diui Lucæ percelebri, lubentes veneramur, eò loci vota in periculis, eò munera in proſperis & grates perferimus. Ibi eam colimus, ubi beneficia quotidie perſentimus. Ibi peculiari quodam modo è tota Sarmatia confluentes, Patriæ ſalutem ei commendamus, quæ Orbi vniuerſo ſalutem attulit, quæ nobis Chriſtum peperit. Etenim quia ille Filius Dei eſt, ideo hanc proximo à Numine gradu colendam Polona ſimplicitate putamus, eiusq; imagines, vti Matris Dei, dignas eſſe omni veneratione iudicamus. Niſiq; ipſa loqueretur, nullius oratoris indiga patrociniſ Pietas Maiorum noſtrorum, quæ tot ac tantis, per multa ſæcula Virginis erudita ſingularibus beneficiis, argumentum & occaſionem dedit, ſuæ religionis ad ſempiternam hominum memoriam commendandæ; aduocarem hîc ſtatim in teſtimonium, viros tam gentili cæcitate offuſcatos, quàm Euangelica luce, in primitiua ſtatim Eccleſia illuſtratos; viros, inquam, illos, à quibus antiquior ſtabat religio, tot miraculis approbata, quàm vt recentioribus vnde quaque tandem conquiſitis argumentis loco moueretur, & animis concepta fides euelleretur. Vt igitur hîc omittam Euagrium, qui aſſerit Diuum Petrum myſteriorum Chriſti imagines ſecum Antiochia Romam detuliſſe: & Hieroſolymis effigiem Crucifixi, auro argentoq; celatam, temporibus Apoſtolorum, inter Chriſtianos exſtitiſſe: & Diuum Pancratium Antiochiæ in collo geſtaſſe: & Nicodemum multas Crucifixi imagines feciſſe. Omittam & Fœlicem Aſtolphum vetuſtiſſimum ſcriptorem, Canonicum Saluatoris, qui dignam ſanè, & pietati Catholicæ perutilem



tilem ponens operam, scripsit Historiam, de miraculosis Dei Matris imaginibus, vbique gentium religiosis. Vnicum hoc illis omnibus opponam, qui Imaginum vsum Apostolis sacrum & sanctum, vel ignorant, vel non credunt; quòd nunquam Saluator noster, viuifici vultus sui effigiem, linteo impressum vello, vel ad Abagarum Edessanum misisset, vel Berenicæ reliquisset, vel totius corporis in sepulchro cubantis, sacra vestigia exsignasset, nisi ad religiosam quandam memoriam, in animis fidelium suorum, sacrum Imaginum honorem ac venerationem extare voluisset: idq; sibi quam carum esset, si multis patere voluit exemplis, tum verò, qui eas impiè temerassent, quam dirè censuit affligendos, vel manifestis prodigiis demonstrauit: vti inter alios Dlugossius quoque noster, simplicissimus veritatis assertor meminit: quem scriptorem, vetusta pridem fama orbi commendauit, etsi non toto splendore Historiæ fulgentem, & præter naturæ cursum ordinarium, ad salutem & ædificationem nostram spectantia sobriè ac moderatè narrantem. Quia timidi etiam esse debent mortales in iis, quæ ad pietatem spectant, perturbandis & conuellendis, quod ab Ecclesia seiuncti, impudentissimè efficiunt. Rectè olim à sapientibus dictum fuerat, quòd *vultu etiam ipso sæpè læditur pietas*. Nullumq; supplicium satis acre reperitur nunc in eum, qui Deiparæ Virginis cultui, temere conatur officere, eiusq; sacras Icones, quas fideles à principio statim Ecclesiæ venerabantur, veluti Dei ipsius, ac humani generis hostis exhorrescere, manuq; scelerata violare auderet. Possem infinita eiusmodi punitionis adducere exempla, sed sufficiet vnum atque alterum circa Czenstochouiensem Imaginem patrum enarrare (neque enim numero, sed genere testium, stat arbitrium veritatis) quo proinde Polonorum meorum animi, spontè in admiranda quæque inclinati, tot stupendis de Virgine altius haustis, non excitarentur modò, verum etiam inflammarentur ardentius; eamq; vti Sospitatricem Sarmatiæ,



matia, ac Reginam suam, omni cultu hyperdulia venerarentur. Sed ut ad nos hæc Imago sacra peruenit, operæpretium est, ut prius vobis A. N. breuiter edisseram, quod credo ipsi etiam calumniarum fabri, apud quos sopitus cultus Virginis, non memoria mortua est, si cordati sunt, nec stomacho imbecilli, non nauseabunt: quia non errant rerum veritates cum errantibus annis, qui hic absque recensione enarrabuntur. Primus itaque Diuus Lucas coepit depingere imagines Saluatoris nostri, & Virginis Mariæ; tum Sanctorum Apostolorum Petri & Pauli, uti testatur Nicephorus Cistus lib. I. cap. 43. & Simon Metaphrastus in Historia sua Ecclesiastica: quorum vterque ante Constantini tempora florere coepit, & à primitiua Ecclesiæ Patribus, qui Apostolorum temporibus vicini fuere, per traditionem accepit, vidit, manibus contrectauit, & uti decebat, in medio cœtu fidelium veneratus est. Vnde & Imago Czenstochouensis, eiusdem Diui Euangelistæ penicillo traditur esse exarata, primo post Assumptionem Beatæ Virginis anno, super eadem tabula cypressi, qua Dei Genitrix in sua domuncula mensæ loco utebatur. Hanc apud se asseruabant Virgines deuotæ honorificentissimè, quæ in domo Zebedæi, ab ipsa Virgine Maria, statim à tempore Ascensionis Christi Domini congregatæ, in castitate perpetua vixerunt, usque ad tempora Diuæ Helenæ Imperatricis, habentes penes se passionis etiam Dominicæ insignia: puta Coronam spineam, clauos quibus cruci affixus fuerat, lanceam, & tria sudaria. Vnum, quo inuolutus erat Saluator noster, cum in sepulchro poneretur: Alterum, quo præcinctus fuerat nudus in cruce pendens. Tertium demum, quo exceptum erat caput, Diui Ioannis Baptistæ, cum ab Herode decollatus fuisset. Has omnes reliquias sanctas, transtulerat postmodum Diua Helena Constantinopolim, Persarum assiduas incurSIONES verita, ne auferrentur inde. Scribitq; Anselmus in Actis Ecclesiæ Constantinopolitanæ, quod velum huius Imaginis,



ginis, quo honoris causa obuelabatur, à primis vesperis fabricati, nemine tangente vltro complicabatur; mansitq; ita imago aperta vsque ad vespertas diei Dominicæ: quibus finitis opera Angelica iterum obuelabatur. Quin & domus illa Zebedæi, in qua tot annis habitauit cum sodalibus suis Virginitatis Primiceria Maria, & in qua post eius Assumptionem gloriosam in cœlum, asseruabantur in illa persecutione Christianorum, supra enumeratæ reliquiæ, tum etiam tempore euerfionis vrbs Hierosolymitanæ, sub Tito & Vespasiano, Impp. sic volente Deo, sic protegente Virgine Sanctissima, inuiolata, & gentilibus inuisibilis mansit. Ibi demum Helena sancta, templum Virgini Mariæ dicatum, sumptu magnificentissimo exstruxerat; quod primum in Orbe, sub eius titulo steterat. Sed dudum iam à Saracenis dirutum, locusq; ille, vti testatur Christianus Adrichomius, ruinis nunc sæptus esse dicitur; ne scilicet à barbaris contaminaretur, vbi primum incontaminata Virgo manserat, deinde à Christianis Vestalibus casta mente colebatur. Sacra verò Imago eius, quæ nunc in Claro monte Czenstochouiæ conspicitur, in capella palatij Bizantini, cum alijs reliquiis, à Constantino Magno reposita, in veneratione fuit apud Græcos Imperatores, ad tempora vsque Caroli Magni. Qui, postquam in Saracenos, terram Sanctam tunc occupantes, terra, mariq; expeditionem suscepisset, inter alios Principes Christianos, qui eum vltro pietatis causa, in sacrum bellum euntem, comitabantur, habuit quoque in commilitio Ruffiæ Principem nomine Leonem, qui subinde ab expeditione sacra reuersus, Urbem à suo nomine Leopolim exstruxerat, quæ hodieum pietate & omnibus virtutibus floret. Igitur cum ab illo sacro bello, Carolus Magnus cum victore exercitu reuerteretur, quod in Annum Christi octingentesimum primum incidisse Historici scribunt, Nicephorus Imperator tunc Græcanicus, quòd se contra barbaros armis iuisset, gratiam Carolo Magno eò maiorem relaturus, in urbem



40  
bem suam gratulabundus excepit: interq; munera regia  
quæ ipsi, & suis purpuratis obtulit, etiam Sacrarij supra me-  
morati reliquias exhibuit, quas Cæsar Germanicus, maiore  
affectu quàm gemmas & aurum excipiens, in templo Beatæ  
Virginis, magnificentissimè à se in gratiarum actionem pro  
felici reditu, Aquisgrani exstructo, reposuit: vbi post fata &  
ipse met sepeliri voluit. Imaginem verò Dei Genitricis Ma-  
riæ, in habitu ex vrbe Constantinopolitana, Leoni Russiæ  
Duci donauit, Nicephoro etiam Imperatore annuente,  
quòd non aliam mercedem gloriosus Princeps, pro susceptis  
laboribus, aut gratiam pro expensis belli, ab vtroque Impe-  
ratore postulasset. O sanctam animam! quæ post aurum  
non abiit, cum ab vtroque Cæsare diuersa sibi munera offe-  
rentur. O inclytum Heroem, qui oblatos sibi varios titulos  
respuit, contentus nomine tituloq; Ducis Christianorum  
populorum, quibus iure naturali præerat. O verum Christi  
athletam, qui non sperauit in pecuniæ thesauris, sed omnes  
reditus suos, & omnem prorsus gazam à parentibus sibi reli-  
ctam, in sacram militiam impendit. Quin & præfatam I-  
maginem Diuæ Theotocon ab Imperatoribus sibi dona-  
tam, quàm maximè potuit, gemmis, vnionibusq; inæsti-  
mabilis pretij exornauit, ac in Russiam suam asportatam, in  
arce Belzensi reposuit; Græci ritus sacerdotibus, eius cura  
commissa. Paucis itaque diebus postmodum, domum illi-  
us omni prosperitate, subditos lætissimo rerum vniuersa-  
rum prouentu, totumq; ipsius Dominium pace desideratis-  
sima, veluti alterum Obededon, in cuius domo Arca veteris  
testamenti hospitabatur, largitor omnium bonorum Omni-  
potens beauit. Et post occasum ipsius, cum cœlibem ducen-  
do vitam, nullum legitimum successorem reliquisset, Cazi-  
mirus cognomento Magnus. Anno à partu Virginis qua-  
dragesimo nono, supra millesimum & trecentesium, ar-  
mis reliquam vniuersam Russiam Regno Poloniæ adiunxit,  
solo Belzensi Palatinatu excepto, qui protectione Virginis  
Theo-



Theotocon, immunis à noſtratium vaſtatione remanſerat. Cæterum corruptis in libertate incolarum ex fœlicitate moribus, cum ſanctitas & deuotio diminui cum tempore cœpiſſet, Ludouicus Poloniæ atque Hungariæ Rex, Anno milieſimo trecentefimo ſeptuageſimo, cum exercitu ſuperuenit, & compreſſis inſoleſcentibus armis, Vladiflaum Ducem Opolienſem, cognatum ſuum, toti illi prouinciæ præfecit. Huic cum aliquoties Ruſſi, vti externo, & remotè manenti in Sileſia, rebellâſſent, eumq; floccipendiſſent, præcipua Belzenſium concitatione & ſuperbia: Vladiflaus regio cum exercitu citò veniens, cum omnem Ruſſiam tu mentem compescuit, tum præcipuè de rebellionis authoribus, qui erant Belzenſis Satrapiæ nobiliores, iuſtas pœnas ſumpſit. Et in Sileſiam ſuam properè abiens, Imaginem B. V. prædictam ſecum alportauit. Quam ibidem in Ruſſia adhuc manens, quòd in obſcuro aſſeruaretur, poſt obtentam ſtatim victoriam, in auguſtiorẽ ac honoratiorem locum protulerat, nequaquam eius pulchritudinem atq; maieltatem quandam inditam ſatis demiratus. Dumq; eam die ac noctu aſiduis precibus, pro ſua erga Diuam innata deuotione veneraretur, euenit, vt Scythæ Lithuanis coniuncti, incurſione inopinata Vladiflaum obſiderent, nec ille ſubditis ex compoſitò refragantibus, tantas vires contrahere potuerit, vt barbaris Marte aperto reſiſteret; dubius de ſalute ſua, ad Virginis opem implorandam confugit, anteq; ſacram eius Iconem prouolutus, tum maximè opem cœleſtem inuocaret, cum à barbaris arx in coronam oppugnaretur, ſagittaq; per fenestram cadens Virginis imaginem in gutture retigiſſet. Tum Vladiflaus caſu conſpecto in ſpem erectior factus, exclamauit. *Cur non vindicas iniuriam tuam ô Virgo potentiſſima? cur hoſtes non repellis à tuis cultoribus ô certiſſimum auxilium Chriſtianorum. Audi, audi ô benigna ad te confugientes, & ſuccurre, & Polonos tuos tibi ſemper deuotos, libera à morte libera*



*libera à captiuitate.* Miraculum! vt primùm verba effatus est Vladislaus, nebula statim circumdedit muros & propugnacula, in qua missi cœlitus bellatores insonuerunt derepentè armis, ita, vt barbaros & à tergo & à fronte perteruerint, fugamq; effusissimam capeffere còegerint, rebus omnibus & oppugnationis instrumentis ad mœnia relictis. Quos Vladislaus cum suis insecutus, partim cecidit, partim viuos in suam potestatem redegit, & postmodum Ludouico Regi suo, cum reliqua alia præda, in Hungariam misit, Diuæ Virginis opitulatu, miraculosam sibi victoriam obuenisse significans, atque simul rogitans, vellet sibi Rex clementissimus, pro præstita in defensione prouinciæ opera, eam sacram Imaginem, benignè donare. Annuit Ludouicus bello tunc Veneto impeditus, & Vladislaus paucos post menses in Sylesiam, hæreditariam prouinciam suam abiens, cum Imaginem, quam secum asportare intendebat, loco suo mouere non posset, solito in faciem prostratus exorare cœpit, vt quid de sua Imagine Diua statuere vellet, signis aliquibus sibi significaret. Nocte igitur sequenti, cum proluxa oratione, suspirijs & contemplationibus fatigatus obdormiisset, responsum quod desiderabat à Diua in somnio accepit. In Poloniam duceret Iconem, inq; Claro monte Czenstochouienfi collocaret, vt nimirum esset in eo Regno veluti in arce præsidium belli & pacis, ac denique velut in aperto discriminum campo, signum confugij in quod lumina conuersi Poloni, Reipublicæ malis præsens remedium implorarent, rebusq; pro Religione præclarè factis, in dies inclarescerent. Lætus ea propter euigilauit, iter statim in Poloniam arripuit, ad Czenstochouiam postridie Festi Sancti Bartholomæi summa cum deuotione venit, sacram Imaginem in loco destinato reposuit; templum & monasterium erexit, redditus assignauit, curamq; religionis Fratribus Sancti Pauli Primi Eremitæ, & custodiam commisit, Anno reparatæ salutis, Millesimo trecentesimo octuagesimo



secundo. Vbi hodie dum etiam ab ijsdem sodalibus honorificentissimè asseruatur, magna vndiq; populorum frequentia, deuotionis causa eò accurrente. Et habet equidem Sicilia Epistolam Virginis ad Senatum Messanensem datam, cuius veneratione in periculis protectionem sibi impetrat. Habet Perusium annulum eius quo Iosepho viro suo subarrhata fuit. Habet reliqua Italia, velum, vittam, zonam, vestes, lac, capillos, domunculamq; illam, in quo Verbum æternum nostram carnem induit. Habet Germania tunicæ illius partem. Nos Poloni præter Imaginem eius, Diui Lucæ penicillo depictam, nihil præstantius habemus: eò accurrimus in periculis, eò vota nostra mittimus in necessitatibus, eò grates referimus in prosperis atq; lætis successibus. Et multum herclè ibi melioris metalli deuotio, in statuas, ingenij in ordinem, laboris in imitationem naturæ, olim expendat: pendebantq; passim in extenso argenti teretis filo, pretiosa supplicum vota, & pœnè integra fælicitatis Polonæ in donarijs historia: Sed hæc vniuersa Bohemicus prædo, cognomine Zizka, Hulsitanæ Hæresis assertor, cum suis sequacibus, qui se Taboritas vulgò appellauerant, Anno à Virginis partu, trigesimo supra millesimum & quadringentesimum, vi asportauerat: sacramq; Iconem suis ornamentis spoliata, secum abducere volebat. Sed cum loco currum mouere nequisset, cui veræ Virginis, Christi q; mansuetæ parentis effigies superposita fuerat, & iuncti plastro boues, fixi pondere immobiles persisterent; quidam ex proteruioribus conscenso curru, ita manu scelerata imaginem in terram deiecit, vt tabula à concussione tres in partes facillè disrumperetur; facie attamen tùm Virginis Sacræ, tùm pueri IESV intacta & illæsa. Iniuriam attamen iniuriæ alius latro addere cupiens, bis in faciem virginis gladio euaginato percussit, & licet frustratim confringere, vti intendebat haud potuit, cicatrices nihilominus duas, sacro vultui intulit, quæ nulla pictorum arte deleri possunt. Cæterum fecit hoc penuria scri-



ptorum, fecit & iniuria temporum, vt in alijs solet, quòd nomina sceleratorum & cognomina (ex primoribus enim Bohemorum erant) non fuerint connotata; quorum alij extemplò vt numen Diuæ violarunt, cæcitate à Deo puniti fuerunt; alij morte subitanea vt in patriam redierunt, perierunt; alij morbis varijs affecti miserè tota sua vita excruciantur; & si quæ in domos suas spolia templi intulerunt, non modò diuitias proprias, sed & familias suas perdiderunt. Nec fama desēs fuit statim, (quam & chartis infedis haud nego) quæ non inuentis tunc scriptoribus, in ore auribusq; populi domum fixit, nostræq; ætati fidelissimè tradidit, vt pauci ex cuneo illo prædonum, ad propria cum spolijs redierint, Nemese eos diuina vbique persequente. Qui autem sceleratorum manus euaserant, Monachi redeuntes ad cœnobium suum, Imaginem disruptam cum lachrymis collegerunt, sepultisq; occisorum cadaueribus, ad reparandum eam totos sese adiunxerunt, & Cracouiam venientes, vt ab Hæreticis trucidati & spoliati fuerant, casum Vladislao Iagelloni Regi, è victoria tunc Prussica reuerso, lachrymabundi retulerunt. Indoluit piissimus Rex, deq; religione Virginis, vt vix alius, eximiè meritis, *apud Machometanos quàm apud Hæreticos religionem Diuorum simulacris maiorem esse*, affirmans. Quod per ea tempora Constantinopoli expugnata, compluribus in templis Christianorum, quæ in vsus & blasphemias circumcisorum cesserunt, Sanctorum imagines in integro, & libros Ecclesiasticos à Turcis asseruari inaudiuerit. Iconem igitur sacram in Prætorio Cracouien- si reponi iussit, curam eius in restaurando & custodiam Senatui vrbs committens, ad exornandum verò eam gemmas & aurum de gaza sua regia deprompsit. Vtq; primùm reparata fuit (coloribus toties de nocte pereuntibus, quos de die periti pictores apponebant, vt cicatrices relictæ essent testes tantæ impietatis apud posteros) Procures quosdam Regni & aulicum suum comitatum, ad deducendum honorificen-



tissimè Czenstochouiam vsque misit, inq; loco pristino reponi mandauit, vt ordinatione Episcopi Diœcesis illius, ritu antiquo cultus religioq; Sacro pignori decerneretur. Vbi itaque ad radicem montis ventum est, nulla præeunte voce humana, occultiore duntaxat vi quadam equi retenti gradum stiterunt, sacrumq; pondus Sacerdotes humeris suis, in verticem montis ad templum detulerunt, cœlesti olim designatione erectum, cum hymnis & psalmodiis diuersis. Exinde locus populi frequentia, nec non vicinorum Principum religione, & munificentia sacrator haberi cœpit: factumq; deinceps consecutione temporum, vt extremis conflictati periculis Poloni, totiens præsentissimum ab ea religione remedium persentirent. Gaudent enim ibi Reges, Pontifices ac Dynastæ Sarmatiæ, simplicitate lacrymarum, sacrisq; promissis fortunam Regni emere: & cum exorauerint, auditas preces sculpta deuotione in laminis confiteri. Quinimo remotiores etiam Despotæ, Vicinarumq; Regionum principes, felices Regnorum suorum euentus, quos propter Deiparæ protectionem sunt emeriti, missis eò donariis, palàm visitantibus Sacram Imaginem meditandos exponunt. Quapropter optarem hoc loco eam mihi in dicendo vim, eam copiam ac facultatem, qua pro Virginis Sospitatricis gloria describere possem, vt bellis Pruthenicis durantibus, barbaricisq; incursionibus nos assiduè vexantibus, pestis atque famis tempore insuper, nobis, benigna Diua, ad sacram hanc Iconam accurrentibus opitulata est. Profectò etenim si nobis ante oculos ponamus, miseram illam ex omnibus municipiis Maioris Poloniæ, post cladem Choinicensem, ciuium fugam, in sylvarum abditis, cliuosisq; montium recessibus, salubrioris aëris temperiem venantium, tametsi omnia calamitatis exempla animis complexi fuerimus, nescio an aliquid dignum ea miseria cogitare poterimus. Alios domi suæ sæuissima pestis enecabat, sparsa per omnes Regni Prouincias, ob nimiam humi-

dita-



ditatem autumnis; alios prodeuntes ante ipsos lares exanimabat; alios exclusos, carorumq; latebras per solitudinem inuestigantes, lassitudo, morbusq; opprimebat. Deprehendebantur passim in viis demortui, nec nisi ob inopiam vespillonum tardius humati, & hoc ipso feminaria contagionis existimatis; nec pauci speluncis cauernisq; prout fors ferebat, iniectioni potius quàm illati, quòd spirantia luem cadauera, nemo sine horrore inspicere, nunquam verò sine certo periculo posset attrectare. Nullum tam immani contagioni erat in carpendo discrimen, nulla conditionis, quòd mortem pedissequam haberet, nulla sexus ratio habebatur: non ætate confectis, ac iam spontaneo naturæ debito in mortem concedentibus, non mulieribus, non infantibus parcebatur. Templà vndique ac vestibula templorum, quinimò extra vrbes & oppida, pagosue, noua passim cœmiteria, fossæq; obuix, sepulchra sufficiebant, ac tabe confectorum cadauera, quæ magistratus conuulsi industria inueniri poterant, superiniecta tantùm modica humo, in Russia atque Lituania præsertim, hauriebantur, cadentibus à complexu parentum paruulis, ac paulò post ipsis parentibus in funere societatis, quos penè raptatos cæteri folsis inferebant, ipsi quoque semianimes, iniuria illuuiæq; consumpti, mortem sæuam licet, malis tamen suis optatissimam haud fallaci mora opperientes. Et quamuis antea sæpius ac postea, pestilenti tabe, Dei Optimi Maximi in peccata hominum ira atque vindicta, conflictata est tota Polonia, nunquam tamen magis fuit deformata quàm tunc, serpente è castris Regiis, quo totius Regni nobilitas ob potentiam Crucigerorum Pruthenicorum euocata fuerat, in omnes prouincias contagione: quæ vrbibus & villis exhaustis, Regnum ad vastam quandam solitudinem rede gisset, nisi spectata tantæ Matris pietas, apud cuius sacram Imaginem Cazimirus Rex, cum Senatu, cernuus supplicabat, in præsentissimis periculis obstitisset. Lugebant non modò templa



& fora, & viæ publicæ, sed etiam agri & vici, omniumq; in animis infederat facies vrbium affectarum. Nihil infrequentius, nihil desertius, magisq; solitarium apparebat; vt Polonia ipsius solitudinis ac vastitatis domus quodammodo videretur; Proceribus cum reliqua nobilitate, ad diuersa Regni confinia dissipatis, contra Liuones, Scythas, Moschos, contraq; Teutones Marianos Borussicos, malis nostris insultantes. In ipsa vrbe Cracouia, quæ Regum sedes & Imperij Sarmatici domicilium est, semiclusæ tabernæ ferè omnes visebantur, vacuæ apothecæ, frigentia mercatorum publicanorumq; tabernacula, squalientia omnia, ita vt ciuitatem quam Virgo Regina Cœli præ cæteris adamare, singulariter protegere, prorsusq; in deliciis habere debebat, vix aliquis agnoscere poterat. Secuta deinde est fames, rerumq; omnium penuria magna, ob paucitatem agricolarũ, & atrocissima cum vicinis bella, quæ in longum deinceps tempus durarunt. Quare frumentaria emporia defecerant, mercatus vacillabant, nummus rarenter proueniebat, & publicorum negotiorum felicitas grauissimè impediabatur. In tanta nihilominus varietate, ita semper steterunt res Polonorum, vt nunquam eatenus verti potuerint, quin semper maiores, suis posteris meliorem reliquerint Patriam, tanquam nati ad eam gloriam & dignitatem viri, quam ex Virginis protectione non solùm consecuturi erant posterì, verùm etiam inde velut à nouis Regni incunabulis, per omnes Religionis ætates, perpetua serie ad hæc vsque tempora propagaturi. Quanquam enim pietas Matris omnium, ex officio redundet in omnes, peculiari tamen fauoris prærogatiua, gratiarum oculi in Polonos inflectuntur, propulsatrix enim iniuriarum ac malorum nostrorum est, quos & in clientes sibi assumpsit, Reginaq; nostra appellari voluit. Cuius sanctitudo, licet pridem rerum admirabilium apud præfatam Imaginem patratorum, in tota ferè Sarmatia nostra, religionem & cultum habuerit præcipuum, speciali attamen modo



modo fecit illum celebriorem, depulsæ rato Superum dispo-  
fitu, præfatæ calamitatis nostræ felicitas. Nec multò enim  
inde damnata solitudine, restituta celebritas & frequentia,  
mercatus oppidorum prisca institutione in statos dies reuer-  
si, breuiq; tùm arma vbique cultissima spectari cœpta, tùm  
colonorum numero, nexu finitimarum ciuitatum, atque e-  
tiam vicinorum Regnorum commerciis, in pristinum sta-  
tum res, fortunaq; Polonorum fauente Virgine, reuocata est.  
Eius rei gratam recordationem hodiedum Cracouienses re-  
colunt, & institutis die Sebastiano Martyri sacro, ad ædem  
illius extra muros vrbs puluinaribus, Magistratus interuen-  
tu, ac totius Cleri supplicatione, religionem solemnem ha-  
bent. Meritoq; detracta hostium spolia, gloria sanè à sæcu-  
lis inuisa, Czenstochouiam primùm aduexisse, ad pedes  
Virginis Fortunatricis deposuisse, ex hoc monte Claro ve-  
lut gloriæ theatro felicitatem toti Orbi Christiano partam o-  
stentasse Principes ac Proceres nostri consueuerant. Nam  
vt Poloni Martia semper indole, multa præclarè ab incuna-  
bulis Regni sui gesserint, vbi tamen suscepto Euangelio ad  
Religionis causam animum traduxerunt, inuecta q; dein  
sub Ludouico Rege sacra Deiparæ Imagine, peculiari sese  
deuotione ei obstrinxerunt, inde quasi initio memoriæ  
sumpto, factis longè illustrioribus apud omnes inclaruère.  
Et quamuis interdum temperata cœli fortuna fortes animos  
agitauit, tristiaq; lætis admiscuit, ita tamen indolem suam ad  
virtutem & constantiam, non temeritate, sed sanis consilijs;  
non præsumptione, sed spe, ac Religione, erga Deiparam  
Virginem traduxerunt, vt cum nullum esset genus belli, in  
quo illos terra mariq; nō exercuisset fortuna, Crucigericum,  
Bohemicum, Morauicum, Hungaricum, Pomeranicum,  
Brandeburgicum, Suecicum, Germanicum, Moschouiti-  
cum, Liuonicum, Dacicum, Scythicum, Turcicum, atque  
demum ciuile, non in Masouia atque Silesia modò, sed in  
ipsis etiam visceribus Regni toties gestum, semper tamen  
hostes,



hostes, aut maleuolos ciues, gessisse tantum bella, Polonos verò, præsertim sanio rem partem Reipublicæ, si non semper vicisse, confecisse certè viderentur. Fueruntq; sanè Sarmatæ nostri priusquam se Virgini dederent, apud omnes Septemtrionales bellorum gloria clari, sed apud Machometanos inprimis in existimatione atque admiratione habiti, ob inuictum animi robur, & constantiam in Religione Catholica, quod non disiunxerint se à capite Ecclesiæ, vt Græci & Bosnenses, nec spreuerint ritus Orthodoxos Romanos, vt Hungari & Dalmatæ, quos illi omnes facilè sibi subiugarunt, quamuis Matrem Dei præcipuo cultu venerantur, & suam pietatem in eam, etiam nummis publicis, cum titulo Patronæ excussis, palam testarentur. Sed inquire in Diuina non est nostrum, nec est fas Christiano. Ea autem omnia, quæ nostri Maiores in cultum Virginis, priusquam sacram eius Iconem, quæ Czenstochouiæ nunc conspicitur, felici quodam omine acquisiuisent, præambula quædam fuerunt, ad eam, quæ consequentibus sæculis Deipara Virgine fauente adepturi erant, dignitatis excellentiam: quando scilicet ad animorum fortitudinem, sacratio- ris fidei cultus accessit, & diuino planè instituto, vsque eo religio Virginis Regno inserta est, vt cum hæc sola omnia apud illos in bello, pace, rebus secundis & afflictis, æquè pos- sit, ea propter omnia in grauissimis etiam Reipub. necessita- tibus, ea fortitudine atque prudentia præstiterunt, quam iurè Christiani omnes mirentur, barbari exhorrescant, Sacri Ecclesiæ Fasti laudare queant. Omitto hic Societates, pas- sim in oppidis ac villis, Virgini Theotocon, peculiari obse- quio deuotas. Omitto sacras eius Imagines, compluribus per Poloniam in locis, miraculorum fama illustres, ingenti copia auri, gemmarum, & argenti vestisq; pretiosæ exorna- tas. Taceo templa in honorem Diuæ magnificentissimè ex- structa, cœtusq; virginum Deo dicatarum, & Sacerdotum, ad decantandas Mariæ, eiusq; Filij laudes, liberalissimè fun-  
datos.



datos. Taceo & donaria à pijs Principibus, priuatisq; hominibus, cum vbique magna, tum in Claromontano Czenstochouiensi templo, inæstimabilia ferè appensa: cum hæc sint priuati potius iuris, quàm publici, priuatoq; animo, quàm publico oblata, quamuis interdum pro publica salute. Vir enim bonus & sapiens, ciuilisq; officij non ignarus, plus omnium vtilitati, quàm suæ consulere debet. Vnde publici boni custodes, vt communi consilio, studio atque opera, patriam charissimam tuentur, ita quoque & vota pro vniuersa Repub. precesq; Deo sæpissimè offerunt. Sed cur toties motibus intestinis, barbarorum incursionibus, vicinorum bellis, fame durissima, & aëris lue infecti, contagione laboramus? Ad arcana æterni consilij decreta, ista referamus, nostraq; vitia non Coelites culpemus: cum accedente corruptioris doctrinæ caligine, cassisq; virtute moribus, ne tenuem quidem serenæ lucis radium, inter complures ciues nostros, ob abusum libertatis, videamus, quibus aliquando lux veritatis Catholicæ ingentibus illata splendoribus, non vno sæculo, fulsit ad salutem. Itaque, si gentes aliquando religione florentissimas, Regnaq; & vrbes sanctitatibus exaggeratas, hodie calamitatibus afflictas, decidisse penitus miramur ac deploramus; ad animos deducere debemus, non eo loco res sedere nostras, vnde moueri non possint, ac inimum fortunæ quoquo tandem impulsu recidere. Nam quod vbique religiones ac sanctitates, ex obrepentibus fatiscere cæperunt hæresibus, ac demum conciderunt, tametsi æternam promittere constantiam viderentur, eam quidem in promptu causam habet, qua nunquam luci cum tenebris conuenire potest. Vicinam videamus Hungariam. Hæc per multa sæcula floruit; quamdiu in ea Virginis cultus, & Catholica religio. Ast vbi eius incolæ, Maiorum suorum pietate reiecta, varias dislecti in sectas, cœperunt Regni Patronam linguis blasphemis proscindere, & à Romana Sede, quæ caput Orthodoxorum est, per maleuolentiam desciscere,



scere, ita statim deridiculè & sceptrâ Hunnica amiserunt, & florentissimam illam Pannonum prouinciam, quæ POMVM AVREVM, ob metalli eius speciei, & rerum vniuersarum copiam, à vicinis nuncupatur, cladibus ingentibus attritam, populationibusq; assiduis accisam, supra sanguinem, tributis grauissimis Turcæ afflixerunt, quod Reginam cœli, nummis publicis impressam, inani gloriatione impij homines iactarent; quemadmodum Iudæi olim, à traditionibus Moyfis recedentes, Templum Domini iactabant, à quibus offensus ipse Templi Dominus, meritò recesserat. Non incuria itaq; mirabitur quispiam, in prouincia tam vasta, in gente tam accurata, nemini venisse in mentem, qui rem ad totius Regni salutem & gloriam spectantem, vel obiter attingeret, qui de Reipub. statu bellorumq; successibus scribens, non aliquando spiritum ac calamum, quem in eo etiam genere Patriæ debebant, ad religionem Virginis reuocarent, ruentiq; plebi in manifestas insanias, & blasphemiam cœlitum, demonstrarent viam salutis. Præsertim cum impij sequaces, virulenti Caluini, perfidi Zuinglij, atque Serueti, reassumpto considerati Nestorij errore (quem summo iure acriter proscindit Epiphanius) Deiparam Virginem in appellatione Matris Dei, vafre circumscriberent, eiusque ac Christi Domini sacras Imagines, scelerata manu, noui Iconoclastæ prophanarent. Quod nostra etiam ætas, prohi dolor! in castris Catholici Imperatoris Rudolphi. II. maximo cum scandalo piorum vidit, recepto Virginis hospitatu, à Turcis Strigonio: quam urbem barbari quinquaginta duobus annis possidebant, libris & imaginibus in æde Cathedrali conseruatis. Quæ omnia statim noui isti reformatores Euangelij, in fauillam per ludibrium redegerunt; atque urbem ipsam paucos deinde post menses, credo in pœnam peccati, turpiter amiserunt. Ex quo apud Machometanos, quàm apud reformatos (si placet Superis) Christianos, religionem Diuorum simulachris maiorem esse, nemo Catholicus



licus ignorat. Sed & ipsi gloriantur, hac in parte sibi cum Machometanis, vt ad Iudæos accedunt, minimè conuenire: hoc fortasse Iudæis etiam peiores, quòd hominem vltra barbaros exuti, nō dūtaxat in Imagines, sed in Diuorū corpōra, sacrasq; exuuias, inhumana prorsus immanitate desæuiant. Puritanos maximè loquor Caluinistas, & eius farinæ perditos homunciones, quibus nihil vnquam in religione visum est sanctum, nisi quòd vltra omnem barbariem ad feritatem belluinam accederet, imò & hanc superaret. Hac nouitate Religionis periit Germania, & nec in hodiernum, à temporibus Luteri, à ciuilibus bellis respirare potest. Hac inuicem sese laniauit Gallia. Eadem infecti aberrarunt ab orbita Dani; cœcutiunt Sueci, Cimmerijs inuoluti sunt tenebris Noruegij; debacchantur in templa & Sanctos Battauī: amiserunt lumen veritatis Angli, & Scoti: blaterant nugas Caluini, Allobroges, & Heluetj, Græci, Sclauones, Ralci, Thraces, Dalmatæ, Bulgari, Bosnenses, Misij, atque alij, iam pridem in seruitutem Turcici Tyranni sunt redacti. Omnes autem isti proprio sanguine prius inundati fuerunt, ex quo in Religione vacillare cœperunt; quod nihil peræque omnium mentes obcœcat, ac exacerbatas, amentes vecordesq; reddit, quàm temeritas ex mutata religione concepta. Sed enim qui apud Cœlites est rerum dispositus, causas in humanis non habet: trahendaq; potiùs iniuria temporum, in proficuum mortalibus argumentum, quàm noxijs sugillanda fortuna dīcterijs; aut etiam ad destinatam Dei immortalis reuocanda vicissitudo sententiam, quæ, sicut interdum ex calamitate hominum gloriæ suæ materiem, ita hominibus benefaciendi sufficit occasionem. Sed hæc à me repetita sunt, ô Poloni mei, vt aliorum exemplo, liquidum euadat, quàm cauta debeat esse in præsentī fœlicitatis cursu fidentia: nec si nunquam alea deerrauit, idcirco perpetua constansq; censenda sit fortuna, quando nec animorum status, quamdiu sub Sole res inter caducas alligata versatur, stabilis sem-



per esse possit; nisi Diuina iniecta constantia, quâ supra vicissitudinem fertur, raro inter mortales gressu dirigatur. Et nisi maior indies incessat cupiditas ad proferendum in animis nostris regnum pietatis, nisi religio Virginis intemperate nostra in Patria pergat incessu, nisi debita templis obsequia suas habeant sanctitates, vana sit in Virginem pietas, inanis ab imaginibus religio, simulatum à donarijs obsequium. Opus est Catholici, vt Serenissimam Reginam Angelorum, Angelica animorum puritate colamus; vt inclytam reparatricem hominum Mariam, reformatis moribus & sincero corde inuocemus; vt purissimam Matrem Dei, impolluto labio veneremur; humilem Virginem, humili de nobis opinione, honoremus. Quæ cum scala Iacob, scalaq; cœli sit, & scalam sese nobis præbeat, ad sistendum in cœlo gradum, sed cuius bases humilitate sunt vallatæ (nec quispiam euadit ad fastigium, nisi qui gressum ab imo carpit) eapropter nullum maius bonum Religioni Christianæ Orthodoxæ, tam patrum, quàm nostro æuo accidere potuit, quàm vt turbato opinionum dissidijs Orbe, viri prodirent semper optimi, doctissimi, sanctissimi, quorum opera & industria, Scala hæc elogijs exornaretur conuenientibus, quamuis nusquam ab hominibus & Angelicis mentibus satis laudari queat, commonstraretur imperitis, commendaretur auersantibus eam, deprædicaretur inter fideles & infideles. Quo vel sic aurea virtutis renascerentur sæcula, eius intercessiõe apud Natum: nouo feruore Christianæ legis arcana inualescerent, eius auspicijs; nouo Diuinitatis pondere firmarentur, eius auxilio, pectora mortalium, partim frigore, partim scelere expugnato. Sed qui maximè sacrarum Imaginum cultum vindicarent, Sanctorumq; in cœlo regnantium necessariam inuocationem, in periculis & necessitatibus, scriptis suis demonstrarent, veterum Patrum more. His præsertim sciolis sæculi moderni, qui nimium sibi sapere videntur, & dicunt. Damnat Filius Dei traditiones  
huma-



humanas Scribarum ac Pharisæorum (Matth. 15. & Marci 7.) propter quas, impedimenta mandatis Dei ipsi facefferent, eò præsertim, quòd Seniorum auctoritate, nec non originis & religionis antiquitate ligatos populi animos crimine grauarent ac inuidia, si contrauenissent. Damnat Isaias (cap. 59.) hominum doctrinas, & subimpetrata à vanitate inuenta, quæ sanctitatem mentita, prouocabant magis Cœleste Numen, quàm placabant: quòd qui huiusmodi commentorum essent studiosi, in corpore præsentì, longè à Deo abessent animis, labiumq; inane, pectus offerrent exanime. Damnat præterea Paulus (ad Collossen. 2.) deprædatricem sanæ mentis Philosophiam, & inanem fallaciam secundum traditionem hominum, secundum elementa mundi, & non secundum Christum. Vera hæc esse concedo omnia, sed in eo sensu prolata, in quo ipse Saluator intellecta haberi voluit, & tuam Hæretice mentem Pharisaicam, ibidem statim graphicè expressam, tacitè quidem, sed nimium prudenter confundit. Qua tu nimirum vltra cancellos humanæ conditionis elatus, puriorem quandam, nostra Catholica, religionem simulans, non modò ipsemet cœcus in omne nefas ruis, sed alios quoque, quasi lucri faciens Christo, in exitium trahis; excogitatis per te, secundum Isaiæ dicta, vanis opinionibus, iram cœlestem prouocantibus. Quod verò ad Paulum? scias quòd non omnem ille amandat Philosophiam, quemadmodum perperam tuus Magister Luterus intellexit, sed quæ sit inanis fallacia, superstitio gentilitatis, falsi nominis scientia; quæ sexcenta Platoniorum Scholis intulit deliria, plurimosq; hominum, quo minus rectè de Deo sentirent, dementauit. Et quam tu, vtrisque manibus amplexus, sacra irrides nostra omnia, abhorres disciplinam Catholicam, & mente insana præditus, meracissimas nugas, omnemq; impietatem sequeris. Nos verò, qui in Romanæ Ecclesiæ gremio commoramur, credimus pro nostra humilitate, Dei genitum de cœlis, vt homo fieret, descendisse, pa-



refacta; in humanitate diuinitatis potentia, & hoc ipso plane perfecto salutis opere, in coelum, vnde diuinitas nunquam recesserat, humanitate subleuata, receptum esse: & per Spiritum deinde Sanctum, Apostolos docuisse, quicquid ad regimen Ecclesiæ, quicquid ad consequendam æternam salutem necessarium foret, illis inspirasse. Et quamuis virginitatis in Matre assertio, longè ab humano intellectu seiuncta sit, agnoscimus attamen, sic ab Apostolis ipsis, Sanctisq; Ecclesiæ Patribus edocti, Gloriosissimam Dei Genitricem Mariam, Virginem ante partum, Virginem in partu, & Virginem post partum extitisse; omnem prorsus errorem stultorum Collyridianorum abhorrentes, qui moræ mentis homines, putarunt Virginem ab humanitate longè subleuatam, diuina fuisse natura præditam, similiq; ac Deum immortalitate, communis debiti expertem fuisse. Profitemur Sanctorum inuocationem nobis in hac lachrymarum valle constitutis, valdè proficuum esse. Maxime verò inclytæ Coelorum Reginæ, Matris & Sponsæ Dei, quæ nobis in ciuitatem munitam, & in murum æreum data est; vt nos confortet benedictionibus Nati sui, donec appareat desiderium collium æternorum. Veneramur imagines Dei Saluatoris nostri Christi, eiusq; Sanctissimæ Matris Mariæ, ac Beatorum omnium in coelo regnantium, vti amicorum Dei, ab ipsis Apostolis, & primitiua Ecclesiæ Patribus per traditionem edocti. Iam autem traditiones eæ demum auctoritatem apud omnes ac dignitatem promerentur, quæ, cum fidei non officiunt, pietatem etiam instanter fouent; eadem verò si antiquæ sint, vetustate sua sanctitatem conciliant; ac postremum, si religioni non parum adminiculi præstant, sacrosanctæ meritò censerī debent, vt qui eas violare dicto factoue ausit, in Diuina omnia humanaq; iura peccasse conuincatur. Enimuerò de imaginibus in Ecclesia Catholica, & conseruandis, & colendis, est traditio ab Orthodoxis, recepta statim ab initio Euangelij, scri-

pturis

pturis Patrum Sanctorum, fideiq; minimè repugnans, auctoritate humana non infirma, diuina significatione longè præstantior, pietate crescente in dies validior, religione per tot sæcula propugnata sacratior, denique certa apud externos fama percelebris, sed innata Polonorum consensione, quæ veritatis lingua est, constantissima. Et anni certè, si interdum indices sunt rerum, non semper securi veritatis pararij, ac vt ipsi sunt fugaces, ita memoriam fugant, nec stabilem rerum cognitionem ingenerant. Quin rerum scriptores vel citimi temporibus, quæ gesta pariebant, in immensum interdum euariant: quid de ijs cogitandum, qui longè remoti, ad rimanda retroacta sæcula dioptram non habent? De Inuocatione attamen Sanctorum, nusquam vel à temporibus Apostolorum dubitatum est, nisi à Catholicæ Religionis hostibus: nusquam de Virginis Theotocon, erga genus humanum beneficijs, fauore, atque singulari patrocinio, inter Sanctos Patres controuersum, nisi inter profugos Apostatas, & emotæ mentis homunciones, quos vel solus omnes confutare luculenter, potest deuotus Virgini Bernardus, aut omnium religiosus laudator Canisius. Imaginum quoque sacrarum lucem, itidem nonnisi infernales tenebriones, toruo vultu aspiciunt, qui vt veritatis hostes sunt, ita nullius ferè sanctitatis aspectum sustinere valent. Maximè autem Domitricis hæresum Virginis splendorem, blæso aspectu perferre non possunt, quòd illa tota Sole cooperta, solem Iustitiæ in vtero gestauerit, obtinueritq; repromissiones, per ora Sanctorum de se effatas, *vt manus eius essent, in ceruicibus inimicorum illius.* Et, *prælians præliaberis in victoriis, & onusta prædis captiuorum triumphum ages.* Pulchrè Hilarius, & ad rem nostram (lib. 7. de Trinit.) *Hoc habet proprium Ecclesia Christiana, vt dum persecutionem patitur, floreat: dum opprimitur, crescat: dum læditur, vincat: tunc stet, cum superari videatur.* Nam quò peruicacius moderni Hæretici, Sacrarum Imaginum cultum impugnant, eò maioribus gratijs apud illas,



las, Numen Cœleste mortales ditat; & quò eas magis virulentibus linguis blasphemant, eò Deus maioribus significationibus, seruorum suorum deuotionem, erga illas comprobabat, & in dies auget: Czenstochouiensis verò Imaginis in Claromonte venerationem sibi beneplacitam, ita quotidie nouis beneficijs exauget, vt quam Diua Virgo, semel gentem sibi addixisset, & in quam non humano dispositu, suam inferri Imaginem voluisset, eam diuersis iam pridem ornamentis daret: templum deniq; Theotocon Mariæ, lecto loco, dicari vellet, in quo illa velut ex designato adyto, vota clientum suorum nouis quibusdam gratiarum suffragijs exceptura esset: vel etiam è specula in alto sita, in defensionem, communemq; omnium vtilitatem prospectura. Hinc energumenos liberare, morbos abigere, mortuos resuscitare, priuatorum pericula propulsare non insuetum ibi: quin iam assidue hæc viluerunt. Cum nemo prorsus locum illum adeat contritus corde, cui Virgo, vel noxarum à Nato condonationem non ferat, vel gloriosam de aduersarijs victoriam non condonet. Vt non humanis rationibus & coniecturis inducar ad opinandum, sed multis & non dubijs cœlo significationibus, quibus nemo non sapiens securè in hanc sententiam ingreditur, Virginem ipsam cœlo sublimiorem, non iam in imagine picta, sed vera sui specie palam de die exhibita, & de nocte in somnio, complures clientes suos consolationibus repleuisse diuinis. Testantur id donaria appensa, & subscriptionibus eorundem ipsorum quibus auxilio & solatio adfuit comprobata; testantur tabularia Cœnobitarum ibidem commorantia; testantur & scripta piorum virorum diuersa. Maximi siquidem sunt viri, non in Polonia modò, sed varijs quoque in prouincijs viciniæ nostræ, quibus sedet pietas ac religio Imaginis Czenstochouiensis, qui hæc disertius in lucem Catholici Orbis protulerunt. Nobis sufficit breuiter hîc adnotasse, vt è Palæstina in Poloniam, hæc sacra Imago fuerit illata, vtq; miraculis, per tot iam ætates claruerit.

rit. Cuius nimirum rei hanc insignem traditionem, eum fidei decretis minimè pugnantem, pietati maximè consentaneam, antiquitate primam, religioni quæ summè proficuum, ex probatissimis authographis collegimus. Ad quæ omnia si accedat nullo non tempore continuata diuersorum Principum deuotio, populi in Virginem indies ardentius studium, multa quæ alia cœlo testimonia, ut humanas taceam auctoritates, non modò temerarius sit qui dissentiat, sed planè à pietate alienus qui dubitet. *Traditio igitur tibi præstendetur auctrix, ô scelerate Iconoclasta, consuetudo confirmatrix, & fides obseruatrix* inquit Tertullianus (De cor. mil. cap. 3. & 4.) & contritis maleuolorum calumnijs atque procatia, altius indies assurget Virginei pignoris in pijs pectoribus memoria. Theophilus Imperator Constantinopolitanus, volens eligere ex omnibus Imperij sui virginibus pulchriorem in uxorem, conuocauerat filias omnium Principum & Nobilium, inter quas vna Icasia nomine, sua pulchritudine omnes adstantes rapuerat in admirationem sui. Imperator experiri volens, num pulchritudini corporis etiam vigor, & prudentia animi responderet, conuersus ad eam dixit. *Per mulierem omne malum derivatum est in mundum,* Cui illa decenti cum verecundia. *Etiam per mulierem omne bonum processit in mundum,* subintelligendo Virginem Mariam, per quam salus apparuit mundo. Reuera enim omne bonum per illam, quia illa ipsa est primogeniæ Euxæ correctio, mulierum ornamentum, humanæ naturæ venustas, cœleste prodigium, atque sacratissimum spectaculum. Illa ipsa est rerum omnium conditarum Domina, diuinum inter Deum & homines conciliationis instrumentum, fidissima cœlestium donorum dispensatrix. Illa sacrosanctum Æterni Regis palatium, ornatissimum Diuinæ gloriæ templum. Illa thesaurus vitæ immortalis, miraculorum compendium, prodigiorum summum prodigium. Illa Mater misericordiæ, Mater gaudij sempiterni. *Cui tantam contulit Deus gratiam,*

E

inquit



inquit Andreas Archiepiscopus Cretensis, *ut ex eius affluentia, unumquemque cultorem sua possit custodire, plus quàm Angeli; de omnibus locis diligentiam habere, plus quàm Archangeli; de omnibus Regni prouidentiam, plus quàm Principatus. Dedit ei super Dæmones potentiam, plus quàm Potestatibus; mirandorum efficaciam, plus quàm Virtutibus; super alios electos præminentiam, plus quàm Dominationibus. Dedit ei pacem & quietem in suo throno, plus quàm Thronis; sapientiam profundam, plus quàm Cherubinis; charitatem succensam, plus quàm Seraphinis. Dedit denique supra omnes Sanctos, omnium gratiarum & donorum cœlestium plenitudinem. Ergo domitrix hæresum Mariâ. Propulsatrix malorum Virgo Christifera, Aduocata Christianorum, Mater ante sæcula Geniti, Sospitatrix Sarmatiæ nostræ, Diua Diuarum gloriosissima, quæ, cum omnium vota & preces vbique exaudit, tum in Claromonte Czenstochouienfi Polonis clientibus suis, singularia beneficia largitur; vicissimq; animos Polo ad se auertit, obsequium auctorat, fidem ad Deum religat. Hinc, qui Dicomarianitarum calumnijs infectus non est, agnoscet Numen Virginis, ubi primum sacram eius Iconem inspexerit. Aucupabitur gratiam Nati, cum adorauerit vultum Matris, quem perpetuò deprecabuntur omnes diuites terræ. Videbit Altissimi virtutem, cum excitata ibidem per Virginem miracula mente deuota perlegerit. Quæ etsi paucis, & exempli duntaxat gratia, tantum libellis narrata sunt, sufficiunt attamen, quo parem in bello & pace; domi, forisq; felicitatem; & in quouis discrimine certum præsidium, in Virginis ope, ad hoc velut asylum flagitanda, imò requirenda, semper Sarmatis reposuisse testatum sit. Qui Patriam igitur Religionem, Virginem amat, non pertranseat quæso locum, insalutata Regina Cœlorum, quæ nos in suam singularem tutelam accepit, & à pijs Regina Poloniæ appellari amat; non grauetur incuruare genu, cum à longè etiam Clarummontem conspexerit, in quo illa deuotos Sarmatas sibi,*

claris

claris atque manifestis beneficijs beat; adoret vbique locorum Dei Matrem, quæ inclytum genus Lechi, in filios sibi adoptauit, in clientes accepit, & à barbarorum feritate, vti veros Christi Filij sui cultores, munitionibus, propugnaculis, arcibusq; inexpugnabilibus, ac omni prorsus bellico apparatu destitutos, peculiari protectione tuetur. Nolo huius rei complura testimonia, præteritaq; exempla adducere, ne nimium prolixus videar; duo tantum aut tria, excitandi ad pietatem lectoris causa, memoriæ hominum propinquiora, breuiter adnotabo.

Anno Messia nati, millesimo quingentesimo trigesimo septimo, illustris familiæ in Podolia vir, Procopius Sieniauius, iuerat pro sua animositate obuiam Scythis, in Poloniam irruere conantibus, vsque in Valachiam, aggressusq; inopinantes, ita fortiter cum illis pugnavit, vt paucas licet cohortes secum habuerit, numerosissimum nihilominus ipsorum exercitum, acie pulsum, in fugam turpissimam conijceret. Sed cum prosperitate elatos milites suos, nimium fugientium tergis instare videret, insidiasq; barbarorum non temere veritus, parum obaudientes ipsemet ad ordines reuocaret, primus in casses Valachorum, Tartaris suppetias ferentium, incidit: à quibus agnitus, & circumuentus, dum audacius pro suo genio resistit, equum cui infidebat, in medio calore amittit, contis ab vtrunque confossum. Igitur ope humana destitutus, dum se lanceis vndique septum videt, ne in manus hostium veniret, ad Diuinam confugit misericordiam; oculisq; in cœlum sublatis, Magnæ Dei Matris auxilium inuocat, animo simul & corde vouens, sacram eius Iconem Claromontanam Czenstochouia visitaturum, vt primum fuisset è manibus barbarorum liberatus. Audit illa benigna, & viribus præ timore menteq; destitutum, ita in hostes continuo animat, vt quasi à limine fati reuersus, qui iam animo penitus conciderat, cuidam approximanti sibi, gladium eriperet, & generoso spiritu concitatus, alios protinus inter-



ficeret, alios vulneribus grauatos, in fugam effusissimam conuerteret; & interim conspectus à suis, adiutusq; , equum subministratum sibi conscenderet, captamq; victoriam feliciter prosequeretur. Quapropter in Patriam cum triumpho reuersus, Regemq; Sigismundum, de more gentis veneratus, in Basilica Diui Stanislai, capta ex hostibus signa è tholo suspendit, deterfisq; militum sudoribus, Clarum montem Czenstochouiensem supplex adiit, miraculoseq; obtentam victoriam, solerti pictoris manu expressam, monumentū Diuinæ miserationis, & luculenti auxilij Genitricis Mariæ, in templo eius reliquit. Vt vel ex solâ illâ picturâ facile agnoscas, non in paruis rebus, Deum propitium, auxilium afferre solere, sed tum potissimum, quando spei superest minimum. Tanta siquidem repente fuerit facta strages cadentium barbarorum, in acie illa, mucronibus vtrò sanguinem impium haurientibus, vt nequaquam aspectum Ducis Christiferae Virgini deuoti, multiplicatis etiam aciebus ferre potuerint, & vel ex vultu ipsius adesse illi Numen coeleste agnouerint. Idem & in Mari Mediterraneo accidit, cum Siciliam inuadere Turca pararet. Melitenses etenim cum classe illius congressi, triremes aliquot in conflictu illo cœperunt, & domum cum victoria redeuntes, prope Gole tam in ancoris steterunt: interim coorta tempestas inopinatò, & captas barbarorum, & Melitensium nonnullas submersit. Procopius Pienionzek eiusdem Ordinis Eques, in sua triremi, eandem fortunam, quàm & cæteri, expectans, vt mortem euadere posset, votum ad Virginem concepit, locumq; Clari montis in patria sua supplex visitare promisit. Audiuit Diua, & serenitatis interim futuræ signum apparuit, radijque Solares, confestim nubes dissiparunt. Igitur qui cum ipso fuerant, spe certa salutis confirmati, insidiantes sibi inter scopulos Saracenos, audacissimè aggrediuntur, fugant, vincunt, capiunt; & ad portum incolumes reuersi, glorificant Deum, cui venti & maria obediunt; Mariâ verò maris

ris stellam lucidissimam, laudibus extollunt. Cuius sacram Imaginem, prædictus Eques, Czenstochouiæ visitans, Anno. 1577. testimonium in scriptis reliquit. Cæterum non vna vice iam, illis quoque ipsis, qui bella aduersus gentem nostram mouerunt, contestatam fuisse Virginis protegentis opem scimus, qui toties ferè succubuerunt in bello, quoties arma iniusta contra Poloniam sumpserunt. Et Sigismundo I. bellum cum Moscouitis, nulla causa à notis prouocatis, more defensiuo gerente, cum Ioannes Conarius Præsul Cra-couiensis, ad altaria Diuæ, pro felici rerum successu, sacra in Claromonte perageret, ipso Natiuitatis eius gloriosæ die, supplicationibus populo indictis, accidit, vt sub tempus Liturgiæ, Oenergumenus quidam, ingenti voce exclamaret, *Eia fratres, quam multos hodie socios in inferno habebimus?* Et tandem, post vnum quasi quadrantem horæ, sub finem tremendi Sacrificij adijceret, *O Maria, quam feruenter tu intercedis, pro tuis Nazaretanis;* Illa enim ipsa hora, Regem, cum hostibus suis apud Orsam depugnasse, postea cognitum fuit. Qui cæsis ultra quadraginta, captisq; amplius decem millibus, de barbaris, votum Deo exercituum Domino vouerat, Matris eius Sanctissimæ Imaginem Claromontanam Czenstochouiæ visitare. Quod & paucos intra dies exsoluit, munera obtulit, Summumq; in Ecclesia Dei Pontificem, Leonem X. de omnibus rebus, per Legatos suos, certiores fecit, implumem adhuc famam tunc, minimè Romam aduolare potuisse existimans. Verum enim uero, quia tempus adeò sui ipsius edax est, & memoriam absomit, vt quæ nuperrimè gesta in oculis vidimus, vix ordine suo, suisq; annis, nedum mensibus ac diebus consignare sine errore valeamus; quid de ijs dicendum putabimus, quæ priscis annorum stadijs præterierunt, & quæ in suo ortu citius consenuerunt, quam cum ætate virentis famæ ad nos peruenirent, quantumuis adesse suis momentis tempora nimium festina-  
rent. Ideo recentiora Virginis, erga nos, clientes suos bene-



ficia recenseamus, quæ, passim patratis nostra ætate miraculis, in cæteris quoque imaginibus suis religionem, in ore verò vulgi, famam vbique obtinuit. Hinc Borcum, in Maiori Polonia, frequentius à pijs hominibus visitari cœptum: Gidle, Mislenice, & templum Sancti Ioannis Cracouiense, in Minori Polonia. Iaroslauia & Lezaïscum in Russia. Skompe atque Siebrcia, in Masouia. Supraslum & Zorauice, in Lituania. Socalia, in Volhynia. Aliaq; complurima Sarmatiæ nostræ Europæ loca, beneficijs Virginis celebria facta. Omittam, vt toties diuersi Patriæ nostræ hostes, eius ope, fuerint à finibus profligati; vt in visceribus Regni, grassantes Schismatici, multoties compressi; vt Hæretici, Hydræ in modum, attollentes capita, à Potestatibus desuper datis, penitus sunt conculcati: Vt Machometanæ gentes insigniter armis vindicatæ. Præcipuè sub extremum imperij, Sigismundi Tertij Pijssimi Regis. Cum enim Scythæ Anno Virginei partus, vigesimo octauo, supra millesimum sexcentesium, per Pocuciam irrupissent, iteratisq; duce Kantimiro, in provincias Russiæ excursionibus, oppida euertissent, matrefamilias, virgines, pueros ingenuos raptassent, vix resistentibus vrbibus grandioribus, ne dicam municipijs, aut pagis: cum, inquam, sic omnia incendio consumpsissent, assiduis populationibus deformassent, direptisq; nobilium villis, & agris vastatis, curias eorum penè excidissent, tandem populo vniuerso, Virginis opem implorante, à Ducibus nostris, aliquoties sunt ad internecionem cæsi prostratiq;. Maximè apud Burstinū, ipso die festi Sanctæ Mariæ Victoralis; qui dies ab omnibus Christianis, ob memoriam victoriæ Naupactensis, celebratur. Quid de bello Turcico dicam? quid de illo terrore Christianitatis, Osmano Sultano? cum vnicuique notum sit, vt Ottomanigenæ, copijs ex Asia traductis, vniuersis trans & vls Danubium Regnis, atque nationibus frœnum iniiciunt, vt vicinas gentes cladibus perpetuis afficiunt; sola Polonia indomita. Quæ Christi habenis assueta,

barba-


barbaro iugo ceruicem inflectere non ferebat, tametsi aliquoties olim Tartarorum oppressa copijs, suorum sanguine redundarit: non vtique sine cœlesti consilio. Quòd Martius ille piusq; cruor, irrigata velut Patria, seminarium faceret posterorum, libertatis & fidei, quàm vitæ amantiorum, vel recenti adhuc calore, ad maiora paulò post audenda, præsentium pectora inflammaret. Vnde, licet pio Pontificum nostrorum instituto, per vniuersum orbem Sarmaticum, in ea victoriæ vota, publicis vbique supplicationibus Deipara vocaretur, quòd non solùm ex communi fidelium sensu, nec vnquam spe fallaci constaret, ipsam præ cœlitibus apud Natū efficacissimè pro Christianis interpellare: Speciali at tamē religione, Vladislav IV. Princeps tunc, suo, Parentisq; sui Inuictissimi semper, nomine, ad visitandum sacram Theotocon Imaginem Claromontanam, pro suis Polonis obstrinxerat; effeceratq; tam pio voto suo, vt bellum illud toti Europæ terribile, paucis diebus conficeretur; & victoria illa, qua fortasse maiorem à condita Polonia, Daciæ solum non conspexit, Mariæ Virginis sospitatu, à partibus nostris stetisset; Tyrannusq; inglorius ad suos reuersus, à proprijs militibus per tumultum discerptus, hostia non ingrata ad Inferos descendisset. Cum itaque Maria sit Aduocata nostra, Sospitatrix nostra, Patrona Sarmatiæ, & Regni Poloniæ inclyta Regina; quæ cùm vbique passim, tùm præcipuè in Claromonte Czenstochouienfi, tribulationes plebium, pericula populorum, captiuorum gemitus, miserias orphanorum, necessitates peregrinorum, inopiam debilium, desperationes languentium, defectus senum, suspiria iuuenum, vota virginum, & lamenta viduarum exaudit: idcirco ad eam omnes accurramus, ante eius sacram Iconem, preces nostras effundamus, clamemus in cœlum, vt non in iustificationibus nostris, sed in miserationibus Nati sui, insurgentem iterum in nos immanissimum Asiæ Tyrannum, longè à ceruicibus nostris repellat, gentes Christianas iugo grauis-

simo



simo ab illo pressas, in pristinam libertatem asserat, locumq;  
istum sacrum, ex quo nos Polonos aspicere dignatur, ita  
suetis beneficijs illustret, vt nullius sit irritum votum, nulli-  
us vacua postulatio, quicumque modò Czenstochoui-  
am adeunt, aut de longinquo Diuam Claromonta-  
nam venerantes, Deum in Trinitate vnum, corde  
contrito adorant.


D I X I.













Biblioteka Jagiellońska



stdr0010194



ΠΡΟΣ ΑΛΕΞΑΝΔΡΑ

ΠΡΟΣ ΒΑΣΙΛΕΥΣΑ

ΠΡΟΣ ΑΛΕΞΑΝΔΡΟΝ

ΕΠΙ ΤΗΣ ΕΠΙΣΤΟΛΗΣ

ΕΠΙ ΤΗΣ ΕΠΙΣΤΟΛΗΣ

11